



## STINAPA TA INFORMA YU DI E PROMÉ CHINES SKUR

E ta yu di un mama surnameño i un tata boneriano; yu di e konosido negoshante Miano di e barío di Antriol. 'E promé chines koló skur' manera e mes ta yama su tata ku orguyo. Ronnie Bernabela ta un guía di turista, taksista i visepresidente di e asosiashon pa taksista. Ya pa 31 aña e ta trahando den e sektor turístiko riba diferente isla di Antia. Awó e ta 9 aña bèk riba su isla natal. Un kabayero ku gusta filosofía i pone bo pensa. Pero sèmpèr ku e mesun 'flair' poétiko. "Naturalesa ta bida! Punto!" ta e ekspreshon desidido di Ronnie ora ku puntr'é kiko naturalesa ta nifiká p'e. "Fo'i e simia di mata te e beibi ku nase. Ta algu masha bunita mes! Nature is life!" Ronnie ta sigui ekspresá ku un espíritu poétiko. Ronnie ta sigui analisá ku fo'i ántes naturalesa, dor di plantashon, tabata fuente di entrada pa e boneriano. Awó ta turismo ta pa hopi fuente di entrada, danki na nos naturalesa. Ta bende Boneiru den eksterior komo un destinashon turístiko danki na e preservashon di entre otro Washington Park fo'i 1969. Awe nos ta hañando e frutanan. Pero segun Ronnie, tin falta di konsientisashon i informashon di e balor agregá ku naturalesa ta duna kada un di nos. Pa asina por buta e naturalesa versus ekonomia den un balanse. Ronnie ta di opinion ku mester tin mas splikashon dikon sierto aktonan no ta pèrmití. Por ehèmpel e prohibishon pa kue turtuga òf karkó. E públiko mester por sinti e benefishinan, e ke mir'é den echo. Ora bo prohibi'é e ta kere ku e prohibishon ta solamente kumbiniente pa e turista i no pa e boneriano. Enkuanto konservashon di e naturalesa boneriano Ronnie ta masha kòrtiku. No tin eskoho: sea bo ta destrui'é òf bo ta konserv'é. Dor di skarsedat di awa no por remplasá e naturalesa den korto tempu si kibr'é. Ronnie ta ekspresá su preokupashon ku Boneiru por keda ku su turismo di naturalesa mirando kuantu konstrukshon tin aktualmente. Especialmente mirando e struktura estatal nobo. Un Boneiru nobo kaminda ku e benefishi finansiero no ta yega serka e pueblo. E maneho di Boneiru mester enfoká riba informashon tokante nos rekursionan natural i desaroyo di e hende. E efektonan di preservashon di naturalesa mester reflehá den e boneriano su eksistensha diario. "Knowledge is power", e ta konkluí fervientemente. *Skirbí pa Natalie Wanga.*

Pa mas informashon i reakshon: STINAPA, telefon 717 - 8444, [info@stinapa.org](mailto:info@stinapa.org)

## NOS TA BIBA DI NATURALESA



**Traha huntu na un desaroyo duradero pa Boneiru**